

U ovom broju, između ostalog, čitajte:

- **U hitnu parlamentarnu proceduru upućene izmjene i dopune zakona kojima se plaće u realnom sektoru brzo mogu povećati do 400 KM**
- **Na inicijativu UPFBiH usvojen Zakon o izmjeni Zakon o doprinosima**
- **Delegacija UPFBiH sa ambasadorom Sattlerom: U fokusu razgovora reforme za jačanje razvoja i konkurentnosti**
- **Usvojena jedna od prioriternih aktivnosti UPFBiH: Omogućava se korištenje pojednostavljenog carinskog postupka**
- **Sastanak predstavnika Ambasade SAD-a u BiH i UPFBiH**
- **Održana sjednica UO Udruženja poslodavaca Kantona Sarajevo**
- **Održani sastanci predstavnika UPFBiH sa delegacijom DF-a i SDA**





U hitnu parlamentarnu proceduru upućene izmjene i dopune zakona kojima se plaće u realnom sektoru brzo mogu povećati do 400 KM

Izmjene i dopune Zakona o doprinosima FBiH i Zakona o porezu na dohodak FBiH usaglašene su sa SSSBiH

U skladu sa najavama objavljenim posljednjih dana prošle godine, Udruženje poslodavaca u Federaciji Bosne i Hercegovine uputilo je, preko ovlaštenih predlagača zakona, inicijativu za izmjene i dopune Zakona o doprinosima FBiH i Zakona o porezu na dohodak FBiH. Kako je ranije najavljeno, konačan cilj izmjena i dopuna ovih zakona jeste povećanje svih plaća zaposlenih u realnom sektoru koje bi iznosilo od 100 do 400 KM. Prema predloženim izmjenama i dopunama dva zakona, na ove povećane neto plaće privredna društva i obrtnici plaćali bi samo umanjene doprinose za penzijsko i zdravstveno osiguranje, što bi omogućilo da ukupno povećanje plaće ide direktno radnicima.

Izmjene i dopune Zakona o doprinosima FBiH i Zakona o porezu na dohodak FBiH usaglašene su sa Savezom samostalnih sindikata Bosne i Hercegovine, odnosno, sa sindikatima iz realnog sektora.

Podsjećamo da je kroz sedam potpisanih kolektivnih ugovora sa sindikatima iz realnog sektora, minimalna plaća povećana na iznos od 630 do 775 KM, u zavisnosti od djelatnosti, što je značajno povećanje u odnosu na iznos minimalne plaće koju je utvrdila Vlada FBiH. Predlažući izmjene i dopune Zakona o doprinosima FBiH i Zakona o porezu na dohodak FBiH, UPFBiH i sindikati iz realnog sektora žele osigurati značajnije povećanje ne samo minimalne, nego i svih drugih plaća zaposlenih u realnom sektoru u FBiH.

UPFBiH zatražilo je od nadležnih tijela Parlamenta FBiH da predložene izmjene i dopune razmatraju po hitnoj proceduri. Također, pozivaju zastupnike i delegate u Parlamentu FBiH da podrže prijedloge UPFBiH i Saveza samostalnih sindikata BiH, jer će njihovo usvajanje doprinijeti povećanju svih plaća u realnom sektoru, poboljšanju životnog standarda građana, uticati na smanjenje odlaska radne snage iz BiH, pri čemu neće biti ugrožen priliv sredstava u budžetske i vanbudžetske fondove FBiH.

Na inicijativu UPFBiH usvojen Zakon o izmjeni Zakon o doprinosima

**Ovim izmjenama su obuhvaćeni radnici u rudnicima uglja, tekstilne i
kožne industrije i stari zanati**



Na inicijativu Udruženja poslodavaca FBiH zastupnici Zastupničkog doma Parlamenta Federacije BiH usvojili su izmjene Zakona o doprinosima, a sada ona treba proći i proceduru u Domu naroda FBiH.

"Zakon smo pripremali u okviru seta reformi i usaglasili smo ga sa predstavnicima Sindikata i poslodavcima. Ovo je prijedlog poslodavaca koji je preuzela Vlada, a čuli smo kako je završio u ovoj proceduri. Preuzela ga je zastupnica Gabela i dala u proceduru. Radnici bi novu plaću za januar ove godine primili na svoju štetu bez ovih izmjena" kazao je direktor UPFBiH Mario Nenadić.

Plaće se ne bi mogle isplatiti sa povlaštenom osnovicom.

"Ne bi bile na nivou onoga što su radnici primali do sada. Niko nema štetu, ni Budžet ni poslodavci. Veoma smo zahvalni što je zakon usvojen" rekao je Nenadić.

Ovim izmjenama su obuhvaćeni radnici u rudnicima uglja, tekstilne i kožne industrije i stari zanati.

Istakao je da su ovim zakonom plaće sačuvane.

Samir Kurtović iz Sindikata je rekao da su poslodavci i Sindikat imali zajednički stav.

Dogovor je u interesu radnika - rekao je i dodao da se ovim otvara put za povećanje plaća.

UPFBiH: Usvojenim izmjenama Zakona o doprinosima FBiH omogućava se povećanje plaća u niskoakumulativnim granama privrede

Ove mjere u interesu su radnika, države i poslodavaca



Udruženje poslodavaca u Federaciji BiH pozdravlja usvajanje Prijedloga zakona o izmjeni Zakona o doprinosima u FBiH na današnjoj hitnoj sjednici Zastupničkog doma Parlamenta Federacije BiH.

Usvojenim Prijedlogom zakona omogućena je izmjena propisanih uslova za primjenu preferencijalne osnovice za obračun doprinosa za radnike u rudnicima uglja, tekstilnoj, kožnoj i industriji obuće te niskoakumulacijskim djelatnostima tradicionalnih, starih zanata.

Ovim izmjenama ostavlja se mogućnost isplate većeg iznosa plaća radnicima u ovim granama, sa sadašnjeg iznosa u visini najniže plaće na iznos od 85 posto prosječne neto plaće, a ujedno se vrši usklađivanje iznosa preferencijalne mjesečne osnovice za obračun doprinosa za ove radnike. Kako je ovo pravo važećim Zakonom do doprinosima isteklo sa 31.12.2022.godine, danas usvojenim zakonom je rok za primjenu ovih preferencijalnih povlastica, produžen do donošenja novog zakona.

Prijedlog izmjena Zakona je usvojen na osnovu inicijative Udruženje poslodavaca u FBiH u okviru prioriternih aktivnosti UPFBiH, koje su predstavljene i kroz dokument "Šta poslodavci

očekuju od vlasti”.

Ove mjere u interesu su radnika, države i poslodavaca, jer omogućavaju povećanje plaća u navedenim proizvodnim granama, a time i povećanje potrošnje, punjenje budžeta i vanbudžetskih fondova i dr.

Udruženje poslodavaca u FBiH zahvaljuje se na razumijevanju i gotovo jednoglasnoj podršci kako Vlade FBiH i sindikata tako i zastupnika u Zastupničkom domu PFBiH i očekuje da će se već na sutrašnjoj sjednici Doma naroda Parlamenta FBiH Prijedlog izmjena Zakona naći na dnevnom redu zasjedanja i usvojiti u istovjetnom tekstu kao i u Zastupničkom domu.

Udruženje najavljuje nastavak aktivnosti na unaprjeđenju poslovnog okruženja, pa time i unaprjeđenju propisa vezanih za doprinose i porez na dohodak, povećanje plata radnicima i osiguranje boljeg standarda stanovnika u FBiH.

Dom naroda PFBiH usvojio izmjene Zakona o doprinosima

UPFBiH također je u proceduru uputilo i dodatne, šire, izmjene Zakona o doprinosima

Na sjednici Doma naroda Parlamenta Federacije Bosne i Hercegovine održanoj 27. januara 2023. godine usvojen je Zakon o izmjeni Zakona o doprinosima. Zakon je jedan u nizu inicijativa Udruženja poslodavaca u Federaciji Bosne i Hercegovine i dokumenta "Šta poslodavci očekuju od vlasti".

Predloženom izmjenom promijenjeni su propisani uslovi za primjenu preferencijalne osnovice za obračun doprinosa za radnike u rudnicima uglja, tekstilnoj, kožnoj i industriji obuće i nisko akumulacijskim djelatnostima, tradicionalnih, starih zanata.

Ovim izmjenama ostavljena je mogućnost isplate većeg iznosa plaća ovim radnicima, sa sadašnjeg iznosa u visini najniže plaće na iznos od 85 posto prosječne neto plaće. usklađen je iznos

preferencijalne mjesečne osnovice za obračun doprinosa za ove radnike kako bi se zadržao približan isti postotak povlastice. Zakonom je također omogućeno produženje roka važenja ovih odredbi do donošenja novih propisa.



Usvojene izmjene u interesu su i vlasti i radnika i poslodavaca jer se omogućava povećanje plaća radnika u navedenim granama a time i potrošnja te u konačnici punjenje budžeta i vanbudžetskih fondova.

Udruženje poslodavaca u FBiH također je u proceduru uputilo i dodatne, šire, izmjene Zakona o doprinosima te očekuje da će se iste u vrlo skoro vrijeme naći u parlamentarnoj proceduri.

Delegacija UPFBiH sa ambasadorom Sattlerom: U fokusu razgovora reforme za jačanje razvoja i konkurentnosti

Delegacija Udruženja poslodavaca u Federaciji Bosne i Hercegovine razgovarala je sa šefom Delegacije Evropske unije i specijalnim predstavnikom EU u BiH Johannom Sattlerom. Cilj sastanka bio je razmjena informacija o trenutnim dešavanjima i tekućim, ali i narednim inicijativama kako Ureda EU u BiH, tako i UPFBiH, kako bi se prevazišle glavne prepreke za snažniji rast, povećanje konkurentnosti te zaustavili trendovi iseljavanja stanovništva i nedostatka radne snage.

Ambasador Sattler je naglasio da davanje statusa kandidata za članstvo u EU BiH otvara

novoformiranim vlastima mogućnosti da se suoče sa dugogodišnjim izazovima i provedu ključne reforme.

Učesnici sastanka složili su se da nedovoljan ekonomski rast, stagnacija dohotka po glavi stanovnika i visoka zvanična nezaposlenost, praćena nedostatkom radne snage u nekim od ključnih sektora - predstavljaju ključne izazove sa kojima se bh. privrednici danas suočavaju.

Globalni poremećaji koji su podstaknuli inflaciju dodatno pogoršavaju ove probleme koje treba hitno rješavati, uključujući izmjene zakona na različitim nivoima vlasti. Potrebne su dodatne promjene za dalje jačanje poslovnog okruženja, uključujući i ciljane intervencije u određenim sektorima, uključujući drvnu i prehrambenu industriju, transportne usluge itd.




Dogovoreno je da će u provođenju reformi, koje moraju biti inkluzivne i uzeti u obzir zahtjeve EU integracija, Ured EU u BiH i UPFBiH saradivati i održavati redovne sastanke, kako bi dogovarali i razvijali prijedloge reformi koje bi, nakon što budu usvojene i implementirane, doprinijele poboljšanju ekonomskom rastu zemlje i približavanje BiH Europskoj uniji.

Predstavnici Udruženja poslodavaca u FBiH upoznali su ambasadora Sattlera sa dokumentom "Šta poslodavci očekuju od vlasti", koji je kreiran i dostavljen političkim strankama u FBiH dva mjeseca prije izbora. Dokument sadrži oko 40 inicijativa za izmjene i dopune zakonske regulative na svim nivoima vlasti, a koje imaju za cilj rasterećenje cijene rada i poboljšanje poslovnog ambijenta.

Usvojena jedna od prioriternih aktivnosti UPFBiH: Omogućava se korištenje pojednostavljenog carinskog postupka

**Pojednostavljeni carinski postupak po fakturi direktno utječe na brzu
snabdjevenost izvozno orijentiranih kompanija sirovinama i ostalim
repromaterijalima**



U sklopu prioriternih aktivnosti Udruženja poslodavaca u FBiH, a u skladu sa dokumentom "Šta poslodavci očekuju od vlasti", Udruženje poslodavaca u FBiH je uputio Vijeću ministara BiH inicijativu za izmjenu i dopunu Odluke o provedbi Zakona o carinskoj politici u Bosni i Hercegovini, s ciljem rješavanja problema ukidanja pojednostavljenog carinskog postupka po fakturi.

Vijeće ministara BiH je na današnjoj sjednici (12.01.2023.) donijelo Odluku o izmjenama i dopuni Odluke o provedbi Zakona o carinskoj politici u Bosni i Hercegovini, sa oznakom EI kao svojevrsnom potvrdom određene usklađenosti sa propisima EU u ovoj oblasti.

Izmjenama i dopunom Odluke, koju je predložila Uprava za indirektno oporezivanje BiH, privrednim subjektima omogućava se korištenje pojednostavljenog carinskog postupka izvoza/ uvoza po fakturi i nakon 31. januara 2023. godine, što praktično znači da kompanije koje imaju ova odobrenja nastavljaju njihovo korištenje.

Na ovaj način omogućava se poslovnoj zajednici u BiH da koristi jednostavnije i brže procedure izvoza/uvoza tokom 24 sata svakog dana u mjesecu, što je od velike važnosti za bh. privredu koja je pogođena krizom na svjetskom tržištu.

Pojednostavljeni carinski postupak po fakturi direktno utječe na brzu snabdjevenost izvozno orijentiranih kompanija sirovinama i ostalim repromaterijalima za proizvodnju u kratkom vremenskom periodu. Istovremeno se omogućavaju povećanje proizvodnje za izvoz i zadržavanje kupaca i stvaraju mogućnosti za proširenje poslovanja na druga tržišta.

Inicijativa za donošenje ove odluke potekla je od Udruženja poslodavaca u FBiH koje je predstavljalo privredne subjekte koji koriste proceduru pojednostavljenog izvoznog/uvoznog carinjenja po fakturi.

Odluka stupa na snagu osmog dana od dana objavljivanja u „Službenom glasniku BiH“.

Sastanak predstavnika Ambasade SAD-a u BiH i UPFBiH



Predstavnici Udruženja poslodavaca u Federaciji Bosne i Hercegovine održali su 20. januara sastanak s predstavnicima Ambasade Sjedinjenih Američkih Država u BiH, ekonomskih oficirima Allison Stepinac i komercijalnim specijalistom Edhemom Brankovićem, zaduženim za ekonomska pitanja u Ambasadi.

Tokom sastanka predstavnici Udruženja poslodavaca informisali su predstavnike Ambasade o aktivnostima vezano za unapređenje poslovnog ambijenta u Bosni i Hercegovini kao i pitanja pokrenutih izmjena propisa posebno Zakona o doprinosima i Zakona o porezu na dohodak te o drugim prioritarnim aktivnostima vezano za poboljšanje položaja poslodavaca u FBiH.

Poslodavci su istakli prioritete vezano za strane investicije, rješavanje pitanja radne snage, dualnog obrazovanja u kontekstu potreba tržišta rada, te potrebe izmijene propisa na svim nivoima u BiH, a u skladu sa dokumentom "Šta poslodavci očekuju od vlasti" koji je predstavljen političkim strankama pred početak izbora u BiH, te je ponovno nakon izbora promovisan kod parlamentarnih političkih stranaka, ali i predstavnicima Delegacije EU u BiH i drugim strukturama međunarodne zajednice.



Predstavnici Ambasade istakli su da podržavaju aktivnosti Udruženja te predstavili projekte koji su kompatibilni sa aktivnostima Udruženja, a posebno su istakli interesovanje za saradnju na projektima borbe protiv korupcije, vladavine prava, poslovne aktivnosti i poslovnog prava, arbitraže, podrške u uspostavi one stop shopova pri registraciji i poslovanju kompanija.

Također su sugerisali i unapređenje saradnje sa Američkom privrednom komorom u BiH, projektima USAID-a i dr. Udruženje će nastaviti usku saradnju i rad na implementaciji projekata sa Ambasadom SAD-a u BiH.

**Video: Smanjimo hitno doprinose, poreze na
plaće i druga opterećenja poslodavaca!
Povećajmo standard i plaće radnicima,
zaustavimo odlaske mladih iz BiH!**



Udruženje poslodavaca u Federaciji Bosne i Hercegovine je u okviru aktivnosti na rasterećenju cijene rada kroz smanjenje doprinosa i poreza na dohodak, u saradnji sa Savezom samostalnih sindikata Bosne i Hercegovine, pripremlilo i otpočelo medijsku kampanju kako bi što prije bile usvojene izmjene i dopune Zakona o doprinosima FBiH i Zakona o porezu na dohodak FBiH, ali i neki drugi vezani propisi iz dokumenta UPFBiH "Šta poslodavci očekuju od vlasti".

U sklopu kampanje, napravljen je i kratki video.

Video možete pogledati na [linku](#).

Sastanak UPFBiH sa Željkom Komšićem i delegacijom DF: Neophodne hitne ekonomske reforme na svim nivoima vlasti



Neophodno je snažnije krenuti u ekonomske reforme na svim nivoima u narednom periodu, zaključeno je na sastanku koje su predstavnici Udruženja poslodavaca u FBiH održali sa članom Predsjedništva BiH Željkom Komšićem i delegacijom Demokratske fronte.

Ovaj sastanak je nastavak aktivnosti UPFBiH s ciljem predavljanja parlamentarnim strankama neophodnih reformi u oblasti privrede sa ciljem povećanja svih plaća zaposlenima, poboljšanja životnog standarda, poboljšanja poslovnog ambijenta, povoljnijih uvjeta za investiranje, smanjenje sive ekonomije i povećanja konkurentnosti domaće privrede.

Predstavnici UPFBiH predstavili su aktuelno stanje u privredi koju karakterizira nekonkurentno poslovanje, veliko opterećenje cijene rada, nedostatak radne snage, zastarjeli propisi kada je u pitanju poslovanje kompanija u realnom sektoru, izostanak kvalitetnog ekonomsko socijalnog dijaloga itd. Predstavljen je dokument UPFBiH "Šta poslodavci očekuju od vlasti" koji je kreiran i dostavljen političkim strankama dva mjeseca prije izbora, a u kojemu je pripremljeno oko 40 izmjena i dopuna aktuelnih propisa sa ciljem poboljšanja stanja u privredi.

Člana Predsjedništva BiH Željka Komšića i delegaciju DF-a, poslodavci su upoznali da su prošle sedmice u parlamentarnu proceduru upućene izmjene i dopune Zakona o doprinosima FBiH i Zakona o porezu na dohodak FBiH, čijim usvajanjem bi se omogućilo značajno povećanje plaća u privrednim društvima i obrtima u vrlo kratkom roku te zatražena podrška DF-a za usvajanje i provedbu ovih zakonskih odredbi.

Sastanak UPFBiH – SDA: Rasteretiti opterećenja cijene rada i jačati konkurentnost bh. kompanija na europskom tržištu



Delegacija Udruženja poslodavaca u Federaciji Bosne i Hercegovine razgovarala je sa članovima rukovodstva Stranke demokratske akcije BiH i rukovodstvom Kluba SDA u Zastupničkom domu Parlamenta FBiH o aktuelnim pitanjima privrede u FBiH i načinima i modalitetima za rasterećenje cijene rada i unapređenje poslovnog ambijenta.

Kako je istaknuto na sastanku, SDA podržava aktivnosti UPFBiH, a posebno je značajno zalaganje i aktivnosti koje Udruženje poduzima sa ciljem zadržavanja radne snage u BiH kroz povećanje plaća radnika u FBiH. Naglašeno je da je jedan od osnovnih preduvjeta za značajnije povećanje svih plaća u FBiH rasterećenje cijene rada kroz smanjenje doprinosa i poreza na dohodak.

Naglašeno je da potrebno ozbiljno shvatiti nedostatak radne snage na tržištu, na koje poslodavci ukazuju duži vremenski period te da je nužno hitno reagirati kroz poboljšanje sistema evidencija posebno aktivnih tražilaca posla u FBiH, ali i kroz mjere podrške i zapošljavanja koje se nude kroz vladine mjere na svim nivoima. Poslodavci trebaju uzeti direktno učešće u donošenju odluka o tim mjerama, kroz učešće u upravljačkim strukturama tijela koja o tome odlučuju.

Na sastanku je istaknuta potreba unapređenja poslovnog okruženja te poboljšanja uvjeta za domaća i strana investiranja u FBiH. U tom smislu potrebno je jačati konkurentnost kompanija iz BiH na bazi komparativnih prednosti kao što su vlastita električna energija, sirovine, prirodni

resursi itd. Zajednička je ocjena da je nužno poduzeti mjere koje će spriječiti uznapredovanu sivu ekonomiju u smislu snažnijeg inspekcijskog nadzora, ali i podrške kroz stimuliranje mjera podrške legalnom poslovanju, pokretanju biznisa i dr.

Razgovarano je i o dokumentu "Šta poslodavci očekuju od vlasti" koje je UPFBiH sastavilo i dostavilo svim političkim strankama dva mjeseca prije izbora, a u kojemu je kreirano i predloženo oko 40 mjera i zakonskih rješenja čije bi donošenje značajno doprinijelo povećanju svih plaća u realnom sektoru, zaustavilo odlazak mladih iz BiH, doprinijelo povećanju životnog standarda građana.

Upućen zahtjev za odobrenje prisustva predstavnicima UPFBiH sjednicama Zastupničkog doma Parlamenta FBiH



U sklopu prioriternih aktivnosti iz dokumenta "Šta poslodavci očekuju od vlasti", Udruženje poslodavaca u FBiH uputilo je predsjedavajućoj Zastupničkog doma Parlamenta FBiH Mirjani Marinković-Lepić zahtjev za redovno prisustvo

predstavnik Udruženja poslodavaca u FBiH na svim sjednicama ovog doma.

Također je zatraženo da se pozivi za sjednice dostavljaju Udruženju, jer se veliki broj tačaka Dnevnog reda redovno tiče privrede i privrednog života u Federaciji BiH, a kako je to bila nekadašnja praksa.

U dopisu upućenom predsjedavajućoj napomenuto je da u Poslovniku ovog doma nema smetnje za usvajanje zahtjeva Udruženja, te da se drugi socijalni partneri, odnosno Sindikat, redovno pozivaju na sjednice.

Predsjednik i potpredsjednica UPFBiH u emisiji Odgovorite ljudima o prijedlozima izmjene i dopune zakona kojima se plaće u realnom sektoru brzo mogu povećati do 400 KM




Koje su neophodne strategije da bi se ublažila ekonomska kriza? Kako zaustaviti stalni rast cijena hrane, energenata? Kako pomoći stanovništvu? Hoće li biti recesije i kako se boriti s njom? Zašto je tako veliki poremećaj na tržištu rada? Što nas očekuje u 2023. godini i je li realan pad cijena? Na ta, ali i ostala pitanja, odgovorili su predsjednik Udruženja poslodavaca u FBiH Adnan Smailbegović, potpredsjednica UPFBiH Snježana Koepruner, potpredsjednik Privredne komore FBiH i profesorom na Ekonomskom fakultetu u Sarajevu Ante Domazet u emisiji Odgovorite ljudima Federalne TV.

Potpredsjednica UPFBiH Snježana Koepruner istakla je da je kriza počela korona virusom, a poslije zbog poremećenih lanaca snabdijevanja su se povećale cijene sirovina, što je bio uvjet da se povećavaju cijene na tržištu.

"Mi u Bosni i Hercegovini se već 30 godina nalazimo u permanentnoj krizi i prilično smo očvrtnuli u rješavanju tih problema. Kad vidimo kako naši građani žive, kakav je standard i kako se bore i sa kakvim sve poteškoćama moraju izaći na kraj. Sada treba rasteretiti privredu i povećati plaće na način da Vlada omogući poslodavcima da povećamo osobne dohotke, ali da nam ne povećaju doprinose. Već u nekoliko navrata sam predlagala da, na primjer, kao što je

Vlada prošle godine davala mogućnost poslodavcima da podijele 1080 KM bez plaćanja doprinosa i poreza, da nam u ovoj godini da da na isti način podijelimo tri prosječne plaće građanima, kako bi oni mogli lakše proći kroz



ovu krizu, a poslodavci na to ne bi plaćali visoke doprinose. Trebamo konačno napraviti neke ustupke privredi naći način kako pomoći građanima", istakla je Koepruner.

Predsjednik UPFBiH Adnan Smailbegović mišljenja je da Bosna i Hercegovina i naše društvo može napraviti snažniji iskorak u odnosu na ovu situaciju u kojoj smo danas, ali da je neophodan bolji poslovni ambijent

"Sigurno jedno od prvih stvari, kao što je gđa. Koepruner rekla, je rasterećenje privrede. Ne postoji zemlja na svijetu u kojoj radnik od zarađenog manje nosi kući. Mi smo prije nekoliko dana izašli s jednom inicijativom, izmjenom zakona, da se nešto brzo riješi. Našli smo jedan model, dok se, naravno, ovi zakoni o doprinosima i dohodak ne usvoje. Dakle, bilo bi temporalnog karaktera, do donošenja zakona. Radi se o tome da za plate koje se povećavaju do 400 KM se uplaćuju simbolični doprinosi, 11% na PIO, da se ne plaćaju puni doprinosi koji su 41,5 %. Time bi se dobilo da fondovi PIO, zdravstvo i ostalo, ne gube prihode. Oni bi ostali na ovogodišnjem, vjerovatno bi i poraslo nekoliko procenata, a s druge strane bi najviše novca otišlo radniku. Time bi se povećao standard naših radnika, potrošnja itd. Mi smo se u našem prijedlogu zakona ograničili se na realni sektor jer mislimo da su to radna mjesta koja zaslužuju određeno povećanje", kazao je Smailbegović.

Emisiju možete pogledati na [linku](#).

Održana sjednica Upravnog odbora Udruženja poslodavaca Kantona Sarajevo




Na sjednici Upravnog odbora Udruženja poslodavaca Kantona Sarajevo, održanoj 25. januara 2023. godine, članovi su najprije raspravljali o Zakonu o izmjenama i dopunama Zakona o turizmu koji je razmatran na sjednici Ekonomsko-socijalnog vijeća KS i u čijoj izradi učestvuju predstavnici UPKS.

Članovi su problematizirali dio koji je i dalje ostao u Zakonu i koji propisuje da su obavezni članovi Turističke zajednice sva pravna i fizička lica koje na području Kantona imaju sjedište ili bilo kakav organizacioni dio i koje ostvaruju prihod pružanjem ugostiteljskih ili drugih turističkih usluga ili obavljaju s turizmom neposredno povezane djelatnosti. Zakonom je propisano da djelatnosti utvrđuje ministar Pravilnikom, u skladu sa Klasifikacijom djelatnosti Bosne i Hercegovine.

Definicija „s turizmom neposredno povezane djelatnosti“ dovela je do toga da su Pravilnikom koji je donio ministar određene i djelatnosti koje nisu u direktnoj vezi sa turizmom. Evidentno je da neke od definiranih djelatnosti nemaju nikakvu direktnu povezanost sa turizmom, a lica koja se bave tim djelatnostima obavezni su članovi Turističke zajednice i ujedno imaju obavezu plaćanja članarine istoj.

Udruženje poslodavaca KS je i ranije upućivalo inicijativu za izmjene i dopune Zakona o



turizmu, te je ista razmatrana na Koordinacionom tijelu za parafiskalne namete. U inicijativi je navedeno da je način na koji je utvrđena osnovica za obračun članarine Turističkoj zajednici potpuno neustavan i da djelatnosti obaveznih članova Turističke zajednice nisu adekvatno utvrđene.

Zaključeno je da će svim članovima Upravnog odbora UP KS bit će dostavljena ranija inicijativa UP KS za izmjene i dopune Zakona o turizmu te da će zatražiti hitan sastanak sa ministrom privrede KS na kojem bi se razgovaralo o Pravilniku o djelatnostima obaveznih članova Turističke zajednice Kantona Sarajevo.

Članovi su raspravljali i o Nacrtu zakona o javno-privatnom partnerstvu koji je također razmatran na sjednici Ekonomsko-socijalnog vijeća Kantona Sarajevo i u čijoj izradi su učestvovali predstavnici Udruženja. Predsjednik UO Suad Ećo je prezentirao primjedbe koje su poslodavci imali na Nacrt te naglasio da je, međutim, ministar rekao da se radi o jako dobrom zakonu, da su ga pripremili stručnjaci i da ga ne treba mijenjati.

Zaključeno je da će se zatražiti hitan sastanak na kojem bi se razgovaralo o Nacrtu zakona o javno-privatnom partnerstvu i primjedbama Udruženja poslodavaca KS na ovaj nacrt.

U nastavku sjednice raspravljalo se i Nacrtu zakona o novčanim podsticajima u poljoprivredi i ruralnom razvoju na području Kantona Sarajevo. Predsjednik Upravnog odbora UPKS Suad Ećo upoznao je prisutne članove da je i ovaj nacrt razmatran na sjednici Ekonomsko-socijalnog vijeća Kantona Sarajevo i da su predstavnici Udruženja učestvovali u izradi ovog zakona. Predstavnici Udruženja su imali jako dobre primjedbe koje su uvažene, a posebno su zadovoljni jer su uspjeli dogovoriti da podsticaj bude 1%.

Upravni odbor UP KS je primio k znanju informaciju o Nacrtu Zakona o novčanim podsticajima u poljoprivredi i ruralnom razvoju na području Kantona Sarajevo.

U raspravi o Zakonu o dualnom obrazovanju, predsjednik Upravnog odbora UPKS Suad Ećo je upoznao članove da je Udruženje poslodavaca Kantona Sarajevo imalo svog predstavnika koji je radio na pripremi ovog zakona te da su svim članovima dostavljene i primjedbe na kojima je insistiralo Udruženje.

Zaključeno je da će se od Ministarstva za odgoj i obrazovanje KS zatražiti posljednja verzija Zakona, te da će se potom usaglasiti primjedbe Udruženja i organizovati sastanak sa

predstavnicima Ministarstva za odgoj i obrazovanje Kantona Sarajevo na kojem bi se prezentirali stavovi Udruženja.

Članovi su raspravljali i o pitanju šta poslodavci očekuju od buduće vlasti. Predsjednik Upravnog odbora UPKS kazao je da je delegacija Udruženja poslodavaca FBiH obavila sastanke sa rukovodstvom stranaka na temu dokumentu "Šta poslodavci očekuju od vlasti" koje je UPFBiH sastavilo i dostavilo svim političkim strankama dva mjeseca prije izbora, a u kojemu je kreirano i predloženo oko 40 mjera i zakonskih rješenja čije bi donošenje značajno doprinijelo povećanju svih plaća u realnom sektoru, zaustavilo odlazak mladih iz BiH, doprinijelo povećanju životnog standarda građana. Informisao je članove da jedino još uvijek nije obavljen sastanak sa rukovodstvom stranke HDZ, te ih upoznao o prioritetnim aktivnostima iz dokumenta.

Predsjednik Skupštine UP KS Muhamed Pilav je precizirao tri ključna prioriteta za novu vlast:

1. Svi parafiskalni nameti na ukupne prihode da se ukinu (porez na ukupan prihod), državna administracija treba da se finansira od poreza na profit;
2. Radikalna reforma biroa za zapošljavanje;
3. Radikalna reforma obrazovnog sistema.

Zaključeno je da će se na ESV-u FBiH delegirati pitanje komunalnih taksi na nivou Federacije BiH, odnosno pokrenut će se inicijativa prema Vladi FBiH da se ovo pitanje harmonizira na nivou Federacije BiH.

Posljednja tačka Dnevnog reda bila je Razmatranje prijedloga za nominaciju poslovnih subjekata za dodjelu Šestoaprilske nagrade Grada Sarajeva. Predsjednik Upravnog odbora je informisao članove da je prethodne dvije godine Udruženje poslodavaca KS nominiralo svoje članice za dodjelu „Šestoaprilske nagrade" te da su obje nominirane članice dobile ovu nagradu. Sprovedena je anketa i obavljeni razgovori sa članovima, te su svi članovi složni da se kompanija Praktik d.o.o. kandidira za dodjelu „Šestoaprilske nagrade Grada Sarajeva iz oblasti privrede" u 2023. godini.

Upravni odbor UP KS je jednoglasno donio Odluku o podnošenju kandidature kompanije Praktik d.o.o. za dodjelu „Šestoaprilske nagrade Grada Sarajeva iz oblasti privrede" u 2023. godini.

Okvirne smjernice BiH za 2021.-2025. godinu za implementaciju načela o poslovanju u ljudskim pravima



Bosni i Hercegovini u maju 2020. godine je data preporuka od Ureda visokog predstavnika za ljudska prava UN-a da se kreiraju smjernice za implementaciju Vodećih načela o poslovanju i ljudskim pravima Ujedinjenih naroda koje su set smjernica za države, privredni sektor, i one kojima su narušena ljudska prava u poslovanju, s ciljem sprječavanja, adresiranja i dostupnosti pravnog lijeka za oštećene u toku poslovnih operacija. S tim u vezi, Ministarstvo za ljudska prava i izbjeglice BiH u saradnji sa Institutom za razvoj mladih KULT uradilo je radnu verziju dokumenta Okvirne smjernice BiH za 2021.-2025. godinu za implementaciju načela o poslovanju u ljudskim pravima koje imaju za cilj inicijativu koja se bazira na vodećim principima Ujedinjenih naroda o poslovanju i ljudskim pravima, sa zadatkom da osigura veće poštivanje ljudskih prava u svim segmentima poslovanja bh. privrednika bez obzira na njihovu djelatnost i veličinu.

Udruženje poslodavaca u FBiH je kroz projekat „Poboljšanje ljudskih prava u bh. privrednom sektoru“, koji je implementiran u saradnji sa KULT-om, učestvao u izradi radne verzije ovog dokumenta, te su primjedbe i sugestije UPFBiH ugrađene u konačnu verziju dokumenta.

Vijeće ministara BiH je sjednici održanoj 09.11.2022. godine razmotrilo i usvojilo Prijedlog okvirnih smjernica Bosne i Hercegovine za 2021.-2025. godinu za implementaciju vodećih načela o poslovanju i ljudskim pravima.

Dokument možete pročitati [OVDJE](#).

Nova članica UPFBiH - Schachermayer d.o.o.




Schachermayer je veletrgovac za proizvode u području tehnologije i dizajna. Ovo porodično poduzeće je uspješno više od 180 godina. Danas svojim bogatim asortimanom pružaju podršku svojim klijentima u području obrta, industrije i trgovine. U uslužnom sektoru potpuno se fokusiraju na klijente.

Tehnički asortiman obuhvaća područja građevinskih okova, okova za namještaj, pričvrstne tehnike, gotove montažne dijelove, skladišnu tehniku, metale, alate, hemijsko-tehničke proizvode, kuhinjske aparate, sudopere, armature i sanitarije, te strojeve za obradu drveta i metala. Schachermayer sebe vidi kao pružatelja usluga i svojim kupcima pruža servis i podršku kroz mnogobrojne usluge u području planiranja, nabave, proizvodnje, prodaje, pakiranja i logistike. Pojedinačna rješenja, sveobuhvatni savjeti i fer cijene karakteriziraju cjelokupnu ponudu.

Više o kompaniji pročitajte [OVDJE](#).

Nova članica UPFBiH - DQS BH - BHcert d.o.o.



Cilj kompanije je da organizacijama daju važne impulse dodavanja vrijednosti za njihov poduzetnički uspjeh kroz najjednostavnije procese, kao i maksimalno poštovanje rokova i pouzdanost. Auditima stvaraju više sigurnosti i veći kvalitet procesa u svim industrijama. Rad kompanije se kreće od certifikacije sistema upravljanja do audita koje se odnose na medicinske uređaje, sigurnost informacija ili održivost.

Kompanija DQS se smatra pionirima i inovatorima s ciljem održavanja, stvaranja i poboljšanja međunarodno uporedivih mjerila. Proizvodi, procesi ili usluge tako postaju sigurniji i kvalitetniji širom svijeta.

Certifikati DQS-a pojednostavljaju globalnu razmjenu između kompanija, regulatornih agencija ili organizacija, a istovremeno jačaju povjerenje kupaca i potrošača u proizvode, usluge i organizacije.

Osnovne kompetencije kompanije leže u obavljanju certifikacijskih audita i ocjenjivanja. To ih čini jednim od vodećih provajdera širom svijeta sa tvrdnjom da postavljaju nove standarde u pouzdanosti, kvaliteti i orijentaciji na kupca u svakom trenutku.

Više o kompaniji pročitajte [OVDJE](#).

Nova članica UPFBiH - Industrija modne konfekcije Kula d.o.o. Gradačac



Industrija modne konfekcije Kula d.o.o. Gradačac utemeljena je 1960. godine kao mala lokalna konfekcijska radionica koja je poslovala u teškim uvjetima, razmještena na više lokacija udaljenih i po nekoliko kilometra. Tokom 1972. godine preduzeće je izmješteno na novu lokaciju u industrijskoj zoni grada, koja je omogućavala budući rast i razvoj. Znatnim investiranjem izgrađen je moderan proizvodni pogon i inovirani proizvodni program. Naredne 1973. godine proizvodi koji su rađeni u Kuli Gradačac pojavili su se po prvi put na svjetskom tržištu. Početak saradnje sa njemačkom firmom Brinkmann obilježava razdoblje afirmacije i razvoja. Danas Kula predstavlja modrenu i respektabilnu fabriku na prostorima Jugoistočne Europe sa više od 770 uposlenih radnika i godišnjom proizvodnjom od 300.000 komada odjevnih predmeta. Tehnološki visokoopremljene proizvodne linije praćene savremenom kompjuterskom podrškom pripreme proizvodnje i krojenja, sa obučenim i iskusnim uposlenicima, kadrovski osposobljena i sa jasnom poslovnom orijentacijom i definisanom poslovnom politikom, Kula se nalazi na stalnom putu prilagođavanja zahtjevima tržišta i razvoja svoje konkurentske sposobnosti na njemu.

Sa razvijenom maloprodajnom mrežom, Kula ima 12 prodavnica u 11 gradova u BiH.

Kula redovno posjećuje sajmove mode, kako u zemlji, tako u regiji i u svijetu. Kulini modeli viđeni su na samjovima mode u Bruselu, Lajpzigu, Duserdorfu i Brnu. Krajem 2007. godine Kula je postala licencirani GORE-TEX proizvođač, a 2008. godine službeno je dobila certifikat međunarodnog ISO stanadarda 9001:2000. Izvršena je recertifikacija međunarodnog ISO standarda u 9001:2008.

Više o kompaniji pročitajte [OVDJE](#).



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba